

四庫全書

集部

欽定四庫全書

一峯文集卷八

明羅倫撰

書

在告與三閭老

起居常禮不敢瀆陳輒有悃誠上千鈞聽倫自往年勞傷作業心血紊經吐咯不已醫者謬庸誤為積熱大寒諸藥經服累年前證暫除病根尚在勞重復萌虛耗日甚轉成痼冷遺漏不禁百計求醫畧無收效形貌猶人

精華已竭元氣既耗六淫七情觸處成病去年被命力疾就道緣途服藥到都苟安暨秋之任少冒熱邪輒發痲瘡自到任後諸證駁加頭目昏暈渾身痺痛院事雖簡而外務沓來乞言問候門無虛日愚性疎直尤恐忤物酬答倦勤稽諸古方詢于明哲僉謂投閒凝神內觀病乃可療積久不瘳後報無期因告吏部移諮定奪候報延久病轉危篤今春加左股骨節濕痛跬步難移日者傳聞行移南部徑自奏請審如所聞則遞道迂滯動

經年歲爰自在告俸給皂隸已行辭遣非惟病勢加深而朝不謀夕勢難久留是用輒露血誠上千天聽若蒙降出欲望台慈深察情悃暫賜投閒醫調痊可隨即赴朝鞠躬盡瘁以備任使若叨蒙榮寵而竊名高蹈則臣子之大罪也倫豈敢有此心哉精神恍迫言語無叙伏惟容照特降處分不勝幸甚

在告與崔冢宰

別更歲籥台斗在瞻素恃愛隆敢罄愚悃惟垂聽焉倫

自蚤歲即乖調攝心血錯經過聽庸醫以為積熱累服
苦寒積成痼冷雜火上炎坎水下漏精元日涸去年被
命緣道尋醫到都苟安入秋赴任觸冒暑淫遂成痞瘡
虛耗日甚百病駸加頭目昏暈痔瘡成漏臂膊酸軟執
鞭揮筆亦不能久今春以還左股骨節濕痛拜跪起伏
動難為禮間嘗發作須扶乃行天地鬼神鑒臨在上非
敢有冒偽之私以取欺罔之罪也獨以病源隱微動口
羞溢天性伉直尤恐忤人扶衰力憊不倦酬應浮議流

聞恐誤台聽未蒙開允行移南部徑自上請審如所傳
遞道迂遠動經歲年爰自在告俸給皂隸悉行辭遣非
惟病轉危篤而藥食之奉饗殮之給無所從出勢難久
留且稽諸古方詢諸耆壽咸謂病根已深惟得投閒內
觀凝神保和然後可愈用是吐露血誠上千天聽倘蒙
賜下伏望鈞慈即賜開允免行勘覆暫令少休以保殘
喘少俟痊可隨即赴部以備任使不勝幸甚

與李賓之

別忽半載自別去內損日甚元氣日耗延及四肢痺痛甚苦舉動因乞歸養苟延餘息圖終報稱直夫來時卜日就道衆曰俟報禮也迺止事委直夫終之而乃悠悠夫為人謀而必忠聖門教人之大方曾子傳道之實功也記語者次有子以孝弟行於家忠信及於人合內外之道也人已有二道豈有人已哉忠於為己而不忠於為人衆人之通病也直夫豈不忠於為人者哉此道之不明耳夫豈直夫之過也固吾之罪也曾子吾不得而

知矣傳曾子之道者非伯淳乎伯淳所至雖僮僕亦終
其事況朋友乎直夫之定交於余者亦既數月矣而此
道不明於其心吾罪可得追也不耘已之田而耘人之
田吾豈敢哉直夫豈以干人者喪已耶夫苟賢也則干
人而進之可也況干退者獨不可乎聞直夫已託足下
矣直夫託足下猶吾託直夫也足下忠於為人者其事
必終矣脫猶未也其往終焉速以文來引踵以俟倫頓
首

與劉用光

倫白用光足下向承過論處臯隸事吾聞之喜而不寐
矣吾弟此論雖權一時之宜未盡合聖賢之道然以今
視之可謂蟬蛻汙濁之中而脫然自新者也吾惡得而
不喜哉然吾猶有說焉豈不信吾弟之過也懼為衆是
之所譴也夫一事之非與十人談之非之者一而是之
者九聞者率從其是而違其非者以非者少而是者多
也今此事也一二人談之一二人以為是三五人談之

三五人以為是數十百人談之數十百人無不以為是
間有知其非者亦垢面縮喙於其間不敢一毫自異者
懼為衆是之所讎也衆人皆以為是而吾弟獨以為非
此吾之所以喜而且懼也吾弟明於知非而果於遷善
必有以實吾之喜而虛吾之懼矣且君子處事當視義
理為是非不當視人情世故以為是非也此事古無有
也祖宗之時亦無有也有自近代始吾嘗見東里先生
三朝聖諭錄載此事是東里時始有也顧佐之為都御

史也東里薦之也一日有言願賣放皂隸者宣宗皇帝召士奇問曰願佐有此事否為大臣而不檢如此何以長風憲哉卿何為薦此人也士奇對曰此事有之近仕者祿不足雖臣亦然非獨願也噫東里誤也重祿以養士不能使好于而家時人斯其辜東里之見也誠憂祿不足乎今日之天下固唐虞三代之天下也以堯舜禹湯文武之道輔其君則天下之大且家給而人足況仕者之祿乎八口之家百畝之田五畝之宅生之有道用之

有節老者衣帛食肉少者免乎饑寒而又以保助乎其鄰里親戚況據四海之富哉大臣以道事君當何所取法耶一事不合乎道或貽四海之憂而遺千百年之患為人謀國不弘經遠之猷而苟且一時近小之利此三代以下所以無善治也東里得君行政如此其專且久也而見不出此何也昔高允事元魏百官俸不足尤以清脩苦節先之東里縱不能以唐虞三代之大臣自期豈可復居高允之下乎其見不出此何也然其初猶未

如此之甚也利源一開末流無所不至以今視之則倍
蓰什百於其初矣其推骨剥髓以病天下之民命蠹士
心而虧國體汙蟻一代之治化而遺羞千載者未有甚
於此也君子所以惡夫作俑者此也脫以為士無常產
以官為家仰事俯育之資無所於出則如吾弟之所處
其亦庶乎其可也今士夫之嗜利無恥者貪多務得旁
求巧取皆以為吾之分當然正猶李赤被廁鬼身入穢
汙過者莫不掩鼻彼方揚揚然自以為釣天帝都而莫

之覺也然秉彞義理之良心吾弟勉為之同志之士安知不有彙興者乎是雖不能頓革一代之積弊而為吾徒者庶乎少免汙穢之辱也則吾弟之所及者多矣善待其生者以百年為千載千載之事在此舉也吾弟勉之

復胡提學書

斯民也三代之所以直道而行也不觀於今人乎目之視耳之聽口鼻之臭味手足之持行固三代之民也而

獨此心異於三代之民乎何其才之古今之相違也是
豈學者之罪哉師之不以其人覺之不以其道耳天之
生此民也使先知覺後知使先覺覺後覺古之覺人者
覺之以禮義今之覺人者覺之以利欲古之為教也方
其幼也覺以小學而行藝立及其長也覺以大學而道
德明今之為教也父之於子兄之於弟師之於弟子其
所以覺之者方其幼也詩律聲對及其長也則科舉爵
祿而已此外無以為也欲人才之逮於古也難矣今欲

革故鼎新必如明道熙寧之論而後可而行之必以其
時必不得已焉如伊川之看詳晦菴之私議取其不戾
於法不駭於俗者時而行之使禮義之教日淑於其心
若修於身也孝弟忠信庶恥禮義行於家與鄉也冠婚
喪祭睦婣任卹則待以異類或彰之於旌善或祿之於
廩餼或貢之於南宮或興之於鄉薦其或超然物外韜
光晦影潛修密造則必旁搜博訪降禮崇德君子之為
善也夫豈求知於人哉而作人之道吾當然也若其悖

於是者姑惟教之教之不改則出之然徒法不能以自行未聞立不得人之法也孔子曰為政在人周子曰師道立則善人多其機軸轉移又在執事取舍之間而已倫自家食聞執事歸謂人曰嶺南高士有陳公甫倫謹識之其後公甫道成德尊名聞天下自執事發之聞公甫之風而興者何時矩矱緝熙輩執事又能張而大之所在學校有若而人拔頴連茹鶴鳴子和則風動而化成矣易德元陳秉常光惠湖西觀其為人皆知重內而

輕外已大而物小相與嘖嘖稱嘆不已曰自有提學作
人之功未有先如執事者也宋之人才如孫泰山張橫
渠李泰伯輩皆自仲淹作之而湖學之盛甲於東南是
時洛學未興而諸公見趣已非漢唐所及程朱以還道
學大明士君子幼學壯行醉夢終身而不知返夫豈其
心異於三代之民哉覺之不以其道下觀者無所從而
入耳治天下無他道風而已伯夷下惠以匹夫奮百世
之上而興百世之下况秉化衡軸皇極有能奮庸四方

不風動乎於治天下何有執事有志當世故為執事陳之伏惟亮察

與周時可書

吾子得第後夏友來問何居曰居給事御史則辭居翰林他官則不辭以給事御史其任重耶辭也是也以翰林他官其任輕也不辭也非也辭讓之心人皆有之先王因人心而制禮也登降辭焉作止辭焉飲食辭焉交際餽遺無不辭焉榮以爵大者不辭可乎古之人有不

辭者矣抱關擊柝垂田委吏也尊者辭也卑者不辭也
翰林之官卑耶不辭非也君子之辭也非偽也禮也全
吾禮所以直吾道也不辭而冒受則道枉矣枉己者未
有能直人者也孟子曰孔子進以禮退以義所以直吾
道也子路論為國而其言不讓夫子哂之況直居其位
而不讓乎先王以禮讓為國其化之成也公卿大夫讓
於朝父子兄弟讓於家士讓於庠序朋友親姻讓於黨
里耕者讓畔行者讓路故曰以禮讓為國乎何有今將

行道以化天下不先之以讓何也登降作止飲食不辭
焉人皆以為非也榮以爵而不辭焉人不以為非也非
其小而不非其大何也今之辭者何宜乎辭內而居外
辭尊而居卑辭朝著而居州邑其宜者也所以安生民
而利社稷也所以正人心而善風俗也所以繼孔孟程
朱之道而範來學也昔范宣子讓其下皆讓宣子一國
士也而況天下乎吾初第時衆以例格吾辭南回嫌於
辭至是在告不能辭今日汙吾榜而福不及斯民吾之

罪也君固吾也君其掾之予日望之

書先府君事畧寄陳石齋

先君姓羅氏修大其字也別號大山宋忠臣水心先生
七世孫始祖諱寅辟五季亂自豫章徙永豐至先府君
十八世矣羅氏在宋由科第登仕銜者數十人多以節
義著聞水心先生開禮松野先生士鼎餘頑先生士俊
滄洲先生時翁其章章者也先君天性孝友兄弟三人
二弟早世語及嗚咽不已曰命有如某乎大父善耕先

生好義崇文先君奉承惟謹無不得其懽心視異出弟
如同氣指其子謂倫曰以養以教汝之責也鄉黨宗族
服其衷公咸取宜焉折過發頰色退省必自愧服或欺
取其資產曰物豈有常主乎家人拾遺曰吾命窮也可
居他人有耶竟求其主給之家政以傳長兄惟權量必
自謹好早起鷄鳴必具巾櫛夜獨行不懼晚益貧啜粥
飲水裕如客至必罄倒而去謂所知曰吾家世忠孝今
有後矣異日必大吾門吾貧且老何恃以為樂乎恃有

此耳俗尚風水說以福禍胥此出長兄頗通之私告曰
某陰宅某陽宅合堪輿家慎勿洩則曰使此地果能福
人耶吾可獨有哉走告曰吾兒不妄汝遂有之歲壬午
明年值春官謂不肖孤曰星家謂吾限出寅當阨汝第
去死生命也不去汝能續乃命乎泣請曰兒去祿仕矣
先君曰吾不汝止第汝欲為之吾恐有不可得者吾知
之矣明年春正月先君果棄養且易簣謂長兄曰母以
異教汙我吾心事天知之縱有地獄吾死不當入矣又

三年丙戌不肖孤果及第皆如先君言嗚呼痛哉先君
心天日也宜得引考者乃不祿焉嗚呼痛哉遺影在堂敢
希叙贊幽明光矣

奉曹州李冢宰書

倫在家食已聞大司馬王公公度及公之名比釋褐南
宮王公已引疾去位縹然如威鳳之在雲漢也公時都
憲臺倫在諸生公獨能以禮下之公卿不下士久矣非
有高世之度絕人之見其能然與既而倫入翰林憂世

之志見公必吐公未嘗不首肯而心服也未幾倫黜泉
南雖雲泥萬里而心未嘗不在公左右居一年蒙恩賜
還夕於杉關夢公有退休之祥比聞公已宰銓衡私謂
不驗未及語公比來南都夢如初告陳廷彥曰李公其
去位乎何其祥形吾夢也未幾公果去位夫公之進退繫
於吾之夢寐如此是豈偶然耶古之大臣身居猷畝而
心在社稷公尚益杜門講學修其身齊其家敦化於其
鄉而風被於天下以裨皇化之未周則身雖退而道益

進跡雖隱而名益彰天下之士之望不虛矣若以進退
為欣戚固非公之志亦非倫之敢望於公也公尚勗哉

復翁宗海書

凡同年四海兄弟也有賢而秀者如吾兄焉則同道同
心又非獨同年已也若倫之蠢且愚者則同年而已其
道固未敢同也吾兄乃不忘而念之倫敢忘吾兄哉自
別建陽中道疾驅聞家兄見背歸已歲除不遑寢食襄
大事也大事既襄已揮淚就道急王命也小吳離家倉

卒遣回四月造朝九月赴任十月在告候問錢帥念已
北上未及奉書非敢忘也所忘者忘其志於終養耳吾
兄之志不移耶固吾之所樂道也夫仕為親榮將以行
其道也道時可行也一官之授必抗章而力辭進以禮
也一言不合即奉身以求去退以義也非固為是以要
君也不如是則枉道矣枉道則辱身以及親矣道時乎
不可行也則山林而已矣畎畝而已矣必不得已而為
親也則抱關擊柝而已矣乘田委吏而已矣君子豈樂

貧賤而惡尊富哉立乎人之本朝而道不行則辱身以
及親矣古之君子榮親以禮義今之君子榮親以爵祿
進士入仕不為給事必為御史不為御史必為主事媚
寵乞墦恬不為恥曰吾以榮親其或守一州令一縣則
戚焉以悲曰其如吾親何給事御史誠美官也然不得
其職則禍蒼生而誤社稷辱親甚矣州官縣令官誠卑
也視抱關擊柝則尊矣一得其職則流芳百世其親之
榮視彼何如也吾初第時欲授卑職以遂初心而二三

同志恐成亢激力沮閤之其流弊至汙吾榜而毒天下
吾之罪也近欲遂初志而百病浸加矣然初志猶未已
也同年中有砥柱頽波者乎固天下之大幸也弘中將
北上昌澤已南求其以吾言告之

與謝元吉書

凡治己必先治心心者舟之舵也欲正其舟而不正其
舵可乎治人亦然不先治其心則一病去一病生矣氣
質有偏則有病偏於剛者病躁急病褊狹病粗疎因其

病而克之可也躁急者克之以詳緩褊狹者克之以寬
容粗疎者克之以謹審然後可也然非心存焉則已熄
而復然已抑而復長病證雖退病根尚在安在其為可
也吾非剛者有剛者病嘗試驗之粗疎平時居多躁急
褊狹則因怒而後見焉情之發也怒為難制方其來也
突如焚如震如乘時而應之則有不勝其悔者矣必堅
忍而力制之候其降伏靜定而後徐而應焉則不中不
遠其悔寡矣吾弟有吾之所無不可有吾之所有如有

吾之所有則一日子而亥一歲春而冬一生少而老持
守此心如過獨木橋如御逸馬如俯懸崖如見大賓而
對上帝使主心常存容氣聽命則病根自除而病證不
形矣如是用功方為第一流人也若徒務制其外而不
從事於其中譬操萬斛之舟於長江大河遇狂飈巨浪
舍舵而惟篙櫓是仗焉吾見其危矣願相與圖之除其
病根其病證則具存於別紙

與陳直夫書

倫頓首直夫大孝賢弟吾初聞令先君遺命計非五十金不可因為一切之計蓋亦古之道焉名德懋慮之不
至初不計足下有疋馬掾屋也其求之人亦與衆計之
豈敢濫取以汙足下哉使無所處邪則行求四方以成
父志可也使有所處邪則如管寧陸贄一無所受可也
今有所處甚善也孔陽早來道吾弟求銘而父猶吾父
也吾豈敢辭哉但其禁方嚴猶自犯之則是猶盟也口
血未乾而已叛去矣二人言之而未信猶見棄於聖賢

況一人之身而所為猶發瘡然焉用此文哉故禁例未開雖同父之賢晦菴猶不為也孔陽謂求德懋仲昭此三人者固不得而讓也然亦只直叙名姓邑里如司馬公論極是不必過文吾當與觀焉聞節約家禮此法良是大本在飲食男女此豈待僕之言哉嫌疑之際猶不可不慎也以敷五能行況吾弟素清約堅忍者有不能哉然亦不可太過致傷生以累老母古人所謂身自執事者面垢而已此可以為法苦蓆雖去地稍高不可

傷濕氣務必漆堅葬法亦須講求不可臨時無措伯恭
居喪授徒子靜極以為非今日使子靜在恐亦不敢以
為非也勉之顯親之道在此而已少有跛臂則天地雖
大吾恐無容身處矣己丑三月十二日信筆

又

葬禮須心中了了到下手處方成得不然或貽終身之
悔矣向背只依山川自然形勢免惑野師浮議居喪雜
儀只依家禮參看儀禮禮記自小祥大祥一依之飲食

自量強進不可因而致病貽老母憂須避嫌疑不可自信而已古人之受汙者多以此人或以是汙之亦無路分說也慎之以治心為先心正百行皆正矣非程朱書不必泛看蓋無許多精力又恐惑人也柔克以剛偽克以誠怠克以勤慢克以敬須先正容體倫告直夫

又

所作哀辭甚淺意不佳乳陽知得下了多少工夫方到吾平日全不用心然不必以此誤正的工夫詩文不如

人無害也。鼎升也要向善，但恐見得局促，可為問金華。廖先生動靜。此公却儘高。自家進善，須無足處。有足便小了。臧否人物，此是一件不好勾當。稱善，須是美事。然必見得透，恐為偽人所罔。但不可求備耳。且居喪言語，不與平日同。朝仲相會，為致聲焉。聞周可大來，僉事。吾友也。倫又言。

與劉素彬書

倫白素彬八哥：昔書與劉某，必從如轉九矣。此非獨劉

某之罪亦吾黨之罪也大抵習俗之溺人如醉者之酣
於酒寐者之酣於夢也所貴乎君子者醉而能醒寐而
能覺也吾嘗猛省焉生三十九年矣無一日不在醉夢
中也此無他醉而寐之者多醒而寤之者少也不知吾弟
之醉且夢今醒已寤且否乎吾固賴吾弟醒我而覺之
也習俗之醉夢人非獨一樣富貴也凡詩文之必於工
科名之必於得皆是也自今以往科名之得失文詩之
工拙皆洗淨而痛決之不使亂吾之念慮一意從事聖

賢之學研精義理檢點身心必至於成人而後已學詩文而至不過為詩人文人而已學科舉而至不過為官人而已學吾道而至則可以為聖人可以為賢人詩文科舉之學固有工之而不至求之而不得者也若夫道在吾身豈有求之而不得哉而世未有工而求之者醉夢於彼而不覺寤乎此也今士夫中稍有繩趨尺步者則羣聚而譙之曰此道學也其中無定守者未有不隨而化矣噫目之視耳之聽手之持足之行吾聖賢也饑


之食渴之飲冬之裘夏之葛宮室之居吾聖賢也喜怒
好惡日用種種吾無不聖賢也獨吾之心不可以聖賢
哉所以為之不必刪述定作如孔子之折衷羣聖以垂
憲萬世也不過求諸吾心致謹於動靜語默衣服飲食
父子君臣夫婦長幼朋友以至辭受取舍仕止久速無
不合乎聖賢已行之成法而已豈有工之而不至求之
而不得者哉孔子曰有德者必有言孟子曰修天爵而
人爵從之道德既修名實既著則言語不求工而自工

爵祿不求至而自至若徒以文章詩律足以自立則楊
雄李白皆可以為聖人而爵位科名則世之宰相狀元
何限其一時之富貴氣燄雖足以歆動鄉閭而奔走天
下之鄙夫庸士卒與草木禽獸同一泯滅漸盡而無聞
其恃以存者若吾鄉之劉丞相董參政者遠足以貽不
令之名為子孫鄉閭之辱也何足道哉公安純篤有志
惜其不能擻地自見耳相見間可以此意道之

與門人書

足下從吾游久矣然所志一科第耳此有命也可必得
哉便使得之不過鄉人稱為官人而已一時之貴耳有
若求之即得上可以為聖人次可以為賢人又其次不
失為君子貴於百世而不泯者則不知求此無他溺於
聞見習俗之卑陋而已求之道無它反諸吾心自念慮
之微達事為之著無一不合聖賢已然之成法是矣入
自小學近思錄始如廣東陳公甫者其人也喬壽資質
好只被科舉壓了頭不知近能擺脫得否若不以得失

置胷中則應舉也未甚害與吾游者善類甚多只在門者少耳相見者其以吾言告之



一峯文集卷八

欽定四庫全書

集部

一峯文集卷

九至十一

詳校官編修_臣李堯棟

中書_臣劉源溥覆勘

覆校官中書_臣田尹衡

校對官中書_臣金光悌

謄錄監生_臣黃廷璧

欽定四庫全書

一峯文集卷九

明羅倫撰

書

奉謝大韶先生書

傳太守來已具書達左右凡丈夫立身自有法度以百年為千載之計此豈待他人言之而後知哉求諸已而已矣胡忠簡早年名節雖與日月爭光可也後其友李彌遜謂曰人生亦不解事事可稱只一兩節好便好胡

後喪名失節此言有以入之也人可無朋友之助哉吾
所望於先生者非但忠簡而已先生之自立宜何如也
比聞治屋高允為相居茅舍溫公為相居土室當二公
之時貴戚大官高門甲第金碧輝映照耀日月摩切雲
漢者何限而今安在哉明仲好議論恐賢者之自立不
徒在於議論也時復相見以吾言示之可發一笑呵

復張都憲書

道中草札塵瀆明聰宜棄水火乃賜珍襲益重愧赧倫

私竊念執事之於倫猶春風之於草也草不謝榮於春
風春風亦不自知其為草之榮也何以為知己報我孔
子曰不患無位患所以立執事之自立宜何如也以幼
之所學為壯之所行上致安於社稷下被澤於生民奮於
百世之上而風乎百世之下然後可也今之學者幸生
程朱之後矣舍程朱而不師猶梓匠輪輿舍規矩而為
方圓也朱子嘗使澠東矣其言曰今日壞了這箇寬字
故其為政多主之以嚴而濟之以寬今紀綱日弛風俗

日滴官吏日貪土豪日橫盜賊日蕃民生日益凋弊天
變於上地變於下有識寒心皆寬之所致也易大畜曰
不家食吉利涉大川謂其能濟天下之險也執事以濟
險之才當濟險之任宜臨餐輟食撫枕忘寐思以濟天
下之險可也昔諸葛武侯治蜀開誠心布公道集衆思
廣忠益諸有忠慮於國但勤攻吾之闕大哉武侯乎執
事近師朱子遠師武侯則險可濟而功可成矣余友章
德懋議論頗有源委似負經濟之畧布衣陳荆夫閩中

高士也以此二人者俯而詢之未必無分毫之助也仕者為通隱者為高皆非中庸之道視道之行否何如爾行藏欲合時請看牀頭易敢為執事頌之

與明三叔書

倫頓首蕭校尉來得十二月書反復數四拳拳欲改酒過吾所深喜也然過之當改豈獨酒哉吾所望者固不獨此也過之在人聖人且不能無況衆人哉君子不貴於無過而貴於改過聖人亦人也過而改之至於無過

則吾亦聖人而已夫日用之間一動一靜一語一默一
飲一食一喜一怒一嘖一笑一辭一受一取一予一行
一止一進一退自一念之微至萬事之著自一身之近
至天下之大有一毫不合乎天理之當然而違乎聖賢
之成法皆過也改之而至於無然後為聖學之全功也
相去數千里過與否吾不得而見之然因言以驗其心
則過之當改者恐非獨酒也曰矢改酒過自今以往道
可不修德可不宗看近思錄實有益其意是矣然別求

好書以切科舉又以家貧為憂則所謂脩道崇德者恐未嘗實用其功而近思錄實有益者姑以應之於口而實未嘗有益於心也正猶昔之熟於酒不自知其過於醉也夫得深則誘小內重則外輕是以飽乎仁義不願膏粱令聞廣譽不願衣繡顏回陋巷原憲環堵夷齊餓於西山閔損辭於汶上皆有得乎此也近世大儒有下第者其言曰今秋幸不為考官所取得與弟姪研磨義理猶舍荊棘而達康莊猶去野店而居安宅修道崇德

之君子固如是也今乃汲汲科舉之得而以家貧為憂則其念慮之差與世之醉夢富貴者何異又非特一語然喜怒頻笑之過而已若以家貧親老未免此途以階祿仕固聖賢之所不棄但不可豫以得失置胷中耳至欲取各處小錄以廣見聞此又惑之甚也科舉文體本自卑弱正昌黎韓子所謂無待學而能者今日小錄又不過一時鄉舉引援故舊頭腦冬烘者以為之耳其披靡文氣支離義理蠱惑士心益又甚矣何乃欲視而效

之耶不過徇時好而急於得耳昔劉幾輩為文過奇詭
未有如今日腐爛軟熟之甚也歐陽公且深惡而痛斥
之而嘉祐士風為之一變吾今力不能變顧乃使則而
倣之又歐公之罪人也特地猛省作急回頭不然終身
酒不濡唇亦醉夢了此一生矣

復丘學正書

人生行樂耳須富貴何時古之達者也倫夙慕斯人而
顛沛一出昔淵明之出為饑所驅為倫之驅者獨饑已

乎此長者所知也已而速反初服抱病幽谷及此星周
八矣進無益於國退無益於己惟思選名山探幽谷枕
流漱石卧雲餐霞以終此餘年他無所願也昔北走燕
南走閩周游萬里隻眼已具未有若吾邦山水之奇而
東南巖壑最勝自古未有發其幽光者其無待於今日
乎良辰美景尋我同好疏食菜羹芒鞋藜杖披蒙茸踞
虎豹登虬龍遇會意處快飲數觴浩歌一曲大書翠壁之
地所復如初以樂吾餘日不亦可乎去年一出正欲了

此而所知親故未亮素懷烹豚炮羔醉飽連日爽氣纔
騰塵襟已塞轅已南而復北席未暖而即行敢故違長
者之命乎為是故也乃廛厚禮稽顙拜嘉願汗沛如伏
惟亮察

復進賢呂大尹書

王方之會厚之至也禮也堂食之分厚之至也義也孔
子曰君子義以為上倫欲買義田周宗族知義之可為
不知力之不可為也執事聞之分堂食以助焉非有尚

義之心其能然乎吾聞之君子視人猶己以義處己不以義處人非君子之道也孟子曰非其義也非其道也一介不以與人一介不以取諸人堂食之助在執事不可與在僕不可取也君子之道無他義利之間而已學之不講未有不以利為義者今時之皂隸堂食以利為義者也食以堂名退食於公之需也非一人可得而私也在執事亦不可取也然則何所用與用備義倉周吾民之急者出乎民者反乎民也君子故曰義也執事欲為

君子與行吾言而已矣執事亮之

復保寧李太守書

倫白太守李君辱書惠以懷賢事屬倫記之甚盛舉也僕敢不祇命獨其中有可辯者不得而默焉夫古者國祀賢於西學鄉先生歿祭于社皆以勸也此為治之本也舍是而求治猶倒植而求茂矣後世此意不講上之責於下下之應乎上者簿書期會之間而已欲求善治得乎迺君獨有此舉必非從事虛文以邀一時之譽

者也其志可尚矣獨其所謂賢者則有可疑焉君殆未之考也夫古之賢而列於祀者必其道德之尊名節之著事功之隆足以為後世之勸者也徒有名位者不得而與焉此聖人之法也按堯叟堯咨並舉進士第一堯佐亦登甲榜堯叟仕宋真宗位至宰輔契丹入寇請幸成都當時若非寇準社稷危矣其後又傳經義附會天書致天下爭言祥瑞卒壞一代治體而宋以此亡其為人如此而可以為賢乎堯咨雖無可考然入為學士出

補名藩功不概見乃精於弧矢自號小由基致母擊之
金魚墜地則其不賢亦可見矣獨堯佐治郡所至有聞
雖韓魏公言其非輔弼才相業無大可觀然朱子錄其
言行列宋之名臣則兄弟中之賢者此殆庶幾也三公
之賢否章章如是今乃概以為賢而懷之又從而祀之
可乎若以其爵位科名足為是邦之重也則如堯叟堯
浴者皆不忠不孝之人丁謂王欽若之流也其一世之
富貴泯滅漸盡遠足以貽不令之名而重為是邦之辱

也何取以為勸哉若以為脩前人之廢典則彼吳昭夫者獨以將相名其堂而閭蒼舒之記其語詞輕重之間亦未嘗概以為賢也惜其不能辯而正之耳自今日觀之則彼二子者亦見人富貴而動念垂涎者也惡可重踵其失乎三公之子孫傳在頴汝間未知是邦有否也若以為廢而去之或傷孝子慈孫之心則禮有之先祖無是善而子孫讓之是誣其祖也所以百世不能改也子孫且不可誣其祖況為守土之官而誣其邦之先臣

乎且太守舉事以大公至正定後世之勸懲子孫固不
得而與也余嘗過呂惠卿蔡京之邦矣問其子孫無一
認以為祖者至其邦人亦羞道之堯叟之邦人與為其
子孫者獨無是心哉質之禮義無一可者君其從吾計
與當撤二公之像沉之於江專祀文惠更三陳為文惠
書院其懷賢者祇以懷文惠之賢也二公雖不能從父
母之教而其父母固以忠孝教之矣別於文惠祠後為
正堂像秦公燕國而祀之使是邦之人為子者知必從

父母之教而為父母者亦知所以教其子也則善矣昔
鼻亭祀象千有餘歲薛伯高由刑部出刺道州即撤其
屋墟其地柳子厚稱其得化人之理楚俗尚鬼且久伯
高一旦去之明者稱快至今況此事自君起之自君廢
之固易易也新一代之耳目定百世之是非在此舉也
君其無疑僕尚當執筆為君記之

與府縣言上中戶書

倫嘗聞程子曰一命之士苟存心於愛物於人必有所

濟王荊公行青苗門人故舊遺書邵子欲投劾去邵子
曰寬一分則民受一分之賜投劾去何益也仁者用心
固如是乎倫素性剛褊好論世事自卧病山中杜門却
掃凡有干謁非獨公事至於文字若非其人皆拒之而
弗答也迺今而有言焉何也孟子曰惻隱之心人皆有
之朱子曰凡民有患難勢可言于官則為言之不可言
則多方救護之吾邑之民困于苛歛其患甚矣予無力
以救之惡得已於言耶古之徵者三君子用其一緩其

二今日有秋糧之征有夏稅之征有上中戶之征用其
五用其六矣欲民之不流離而去為盜也難矣為民父
母行政何忍至於此也諸征姑勿論以上中戶言之吾
幼時猶未有也祖宗之時未有此法也各布政司未有
此例也作俑者何人乎始者一里或一二名今一里有
十數名者一家有兩三名者一都有百十名者聞諸人
云合縣二千六百名掾則曰一千四百八十名吁何其
多也詢之旁縣無如是之多也徵諸往時無如是之多

也度諸事勢亦無如是之多也吾鄉八九兩都素號重
難永樂以來雜役悉免今不下二百名矣所征人戶逃
絕者有之無糧者有之軍匠者有之秀才者有之鰥寡
孤獨者有之欲憑元報以盡征之可乎若曰戶有虛絕
田無逃亡此可施之於經界既正之時不可施之於賦
藝之日何也民田畝數升官田畝數斗下甲人戶原佃
官田寒暑之衣食不給橫豪之剝削無已官府之征求
無藝乃以官作民鬻于他主田居富屋糧坐下戶況里

書作弊飛派詭寄一區虛糧有至數百石者一里有至數十石者一家有至數石者欲執糧以定征可乎吾見多矣凡有科差吏胥舞文里老受託以上而為下以下而為上田連阡陌者諸科不與室如懸罄者無差不至可痛也可悲也今所征人戶賣屋者有矣賣田者有矣賣牛者有矣賣子女者有矣脫婦人之簪珥者有矣敲扑之下何求不足冤號之聲上徹于天人事既乖天道不順苦雨連月米珠薪桂官吏里胥旁午鄉曲鷄犬不

寧為民父母行政何忍至於此也若求賕於糧里已賕
虛糧已賕鹽糧又賕中戶賕如其多也民有所不堪
矣然則何為而可也吾聞紙價數萬四十六縣出之一
縣一千則四萬六千矣縣加五百則六萬矣吾縣以一
千五百為率除已征若干尚欠若干未征若干其逃亡
死絕軍戶生員貧難下戶悉應蠲免外其餘人戶多則
朋合少則獨征足一千五百之數則已矣事難懸度其
損益又在執事裁之也主於不傷吾仁民之心而已若

據元申之數務求取盈以媚上司之意而失下民之望
恐仁者之用心不如是獨執事未知其情耳使知之也
其有不從乎或曰其如上司何予應之曰公卿大臣其
天人耶抑生於人間也方其困於閭閻游于學校擊節
伊周高談孔孟其志何如哉一旦得行其道其不能為
吾民之福乎民者邦之本也財者民之命也傷其財則
傷其命傷其命則傷其本矣朝廷建官分職所以固其
本也諸公其肯傷邦家之本而不能為吾民之福乎鄭

俠布衣也見民苦於新法為流民圖以進況名在從臣之列者吾當披肝瀝膽以與爾百姓請命諸公宜無不從者信筆遽書不覺滿紙

與族叔謙益先生書

倫與叔父幼並艱苦今倫幸叔父不幸者豈盡才力不足哉是蓋有命焉貴之由乎命者固不可必得矣有若求之必得非命之可制者人自不求耳是故士有布褐蓬茅而光榮百世者亦有重侯累印而汙蠅千載者此

脩其貴於己者而彼徒得於人者為貴也貴於己者孟子之所謂良貴吾心本然之善也善之所進有高下人亦隨其有而貴之人心秉彝之至公也不必遠引以吾家觀之松崖先生端厚柔慈一家一鄉之善士也一家一鄉之人貴之雪菴先生清心寡慾脩德謹行吳司業稱其以道尊天下楊少師稱其為江西一人劉子欽稱其心地無愧程朱名公巨卿游其門者異日頌其德美莫不齋浴涕洟下至閭里野夫婦人亦莫不喜道其姓

字此一國之善士也故一國之人貴之水心滄洲松野
餘碩以至士迪先生或提孤旅赴難勤王視死如歸或
慷慨激奮謀復宋社而大志無成或棄官高蹈自比殷
頑或上書相府乞存宋祀而屢聘不屈或妙年英發博
綜羣集而終身不仕當時名人如文丞相趙孟滌吳草
廬劉須溪周翠庭歐陽道或師之或友之或製服哭之
無不推而尊之雖丁末造道不能大行於天下而孤忠
清節昭耀千古至于今為烈此庶幾天下之善士也故

天下之人貴之是數君子者或肥遯巖谷或沉晦下僚
所立耿耿子孫至今賴焉況以聖賢之道自立者乎叔
父未可以為不幸也在自勉而已矣倫雖幸至此地使
徒以得於人者可恃而少變其未達之所守則上辱祖
宗下累子孫也必矣其幸者又所以為不幸之甚者也
詩曰聿修厥德毋忝爾祖叔父以之

戒族人書

列位叔父列位兄長別後想得安康倫別無他囑為人

祖宗父兄者惟願有好子弟所謂好子弟者非好田宅
好衣服好官爵一時誇耀閭里者也謂有好名節與日
月爭光與山岳爭重與霄壤爭久足以安國家足以風
四夷足以奠蒼生足以垂後世如汴宋之歐陽修如南
渡之文丞相者是也若只求飽暖習勢利如前所云則
所謂惡子弟非好子弟也此等子弟在家未仕也足以
辱祖宗殃子孫害身家出而仕也足以汙朝廷禍天下
負後世甚至子孫有不敢認如宋之蔡京秦檜此豈父

兄祖宗之所願哉想其勢焰官爵富貴豈止如今日鄉里中一二前輩也而今日安在哉然所謂好子弟者亦在父兄子姪成就之耳人才之盛鄉黨為最然非父兄敗之則子孫喪之取譏天下貽笑後世甚可惡也載之史書使後世之明君賢主輕棄南人未必不由此也吾願叔父聽之子姪戒之共懲成我做天地間一箇完人蓋未有治國不由齊家家不齊而求治國無此理也何謂齊家不爭田地不占山林不尚鬪爭不肆強梁不敗

鄉里不凌宗族不擾官府不尚奢侈弟讓其兄姪讓其叔婦敬其夫奴恭其主只要認得一忍字一讓字便齊得家也其要在子弟讀書興禮讓若不聽吾言譬如爭一畝田占一畝住基兩邊不讓或致人命或告官府或集親戚所損甚大若以此費置買前物所費幾倍若曰住基無賣此又愚也其所以為此計者不過遺自己之子耳父母之心愛子孫一也今奪吾父母之子以與自己之子甚非吾父母之心也父母雖不在逆其心則逆

天理矣安知吾子孫不如今日之爭哉凡事皆此類也而此事尤切故特言之今後若有田地等物不明只許自家明白不許擾及官府我若不仕尤當守此言也其餘取債之屬民甚貧窮可憫自己少用一分便積得一分德奴僕放橫不可放起自今以後無片言隻字經動府縣方好不然外人指議此人要作好人不能齊家世間安有此等好人哉由此得禍不可知也魚我在此國事日在心懷仲淹做秀才時便以天下為己任況今日

乎進退得失有義有命吾心視之已如孤雲野鶴脫灑
無繫自古壞事皆是愛官職底人弄得狼狽了脫使根
本不安枝葉自能保乎戒之戒之若使我以區區官勢
來齊家不以禮義相告便成下等人了但中間有等無
知子弟與不才奴僕弄出事來則須治之以官耳叔父
須戒之慎勿以吾言為迂也

與張廷芳

今之進士上者期給事次者期御史又次者期主事得

之則哆然不勝其大視同年亦漠然也其視州官縣令若鵠鸞之視腐鼠唯恐汙其喙矣一或得之則龜耗魄喪對妻子涕泗橫流蕭然不勝其小矣視彼三職者恍九地之視九天也至有垢面婢膝昏夜乞哀以求免者矣噫樊也極矣君子之仕也將以行其道也道有所隱泙忍媿姍以保祿持寵者雖尊為王公貴為卿相君子視之陸海中一塵也何給事御史為乎哉苟在我也雖晨門封人乘田委吏千古之下仰餘光而望下風者若

景星鳳凰之不可及也況州官縣令哉今之近民而得
行其道者莫如令其次莫如守同年近補外者不旬月
間佳聞四達視彼之居三職而寂焉無聞者固已一金
一泥矣況進此而上乎吾子其無以彼之自大者自大
而以己之小者自大云

與劉顯仁

僕聞賢才出國將昌子孫才族將大所謂才者非必科
名爵位之謂也今劉氏之子孫盛矣然必期以久大之

業然後可也吾丈非不知之然行或不逮非真知也
今為士者殺之使為穿窬有不可得者知之真也一日
不死須做一日是目下便立定跟脚以此律身以此教
子便不枉一生矣吾丈達者故及之

又

顯仁先生知己自古水別回思僕之罪大矣所見多不
明所論多不正所行多不當所貴乎友者以其有助已
也君之助僕者多矣而余之助君者何如哉何待君之

薄也此僕之罪所以大也君圓通廊落練達老成何有僕之助哉然友道固如是也若徒資助於君而無一言以為君助是故非君望僕之心也朋友之倫豈宜如是之薄哉異日恐無以見聖賢於地下也凡吾之所欲言者皆君之所已知也皆聖賢之所已行也皆天下士讀書者所共知也而天下之人卒未見有行之者何也溺於流俗而不自知也今天下之俗士不登科登科不給事御史給事御史不方伯連帥方伯連帥不侍從六卿

侍從六卿不師保閣下不已也求而得之者非徒自以
為榮天下之人狐媚而鼠趨之矣求而不得者非徒自
以為辱雖親戚朋友皆笑其迂濶而鄙其無能也凡其
求而得之者皆自以為大智然自君子觀之則卒自陷
於大愚而不自知也何也流俗雖不美而天下未嘗無
正人天下未嘗無正論此固人心之所以不死而天道
之所以扶持斯世者也斯人也雖自以為大智而卒無
以服天下正人之心卒無以得天下正論之歸近則貽

羞於一世遠則遺臭於後世正士羞與同朝鄉人恥於
同里遠裔子孫恥以為祖卒與草木禽獸同一泯滅漸
盡而後已此其自以為大智非大愚而何哉原其立心
之初豈期至於此哉特溺於耳目見聞流俗之非而至
此也且人之所以求富貴為身與口而已子與孫而已
身之所衣者寒不過一裘暑不過一葛口之所食者肉
不過一豆米不過一升酒不過一壺子孫終非我所能
謀而保其有也而一念之非遂至如此非大愚而何哉

君達人誠不至此也昔禹之戒舜曰毋若丹朱傲毋慢遊舜豈丹朱慢遊者哉特禹之戒舜當如此也君豈至此哉特僕之告君當如此也孔子曰進以禮退以義自秦漢以來此義不明於天下千數百年號為儒者多無完人為以此義不明故也至宋程朱數大儒出相與講明力行其守難進之禮則一官之授必抗章而力辭其秉易退之義則一言不合即奉身以求去當時公卿士夫多已從化故宋之治俗幾乎三代者數君之力也惜乎

人主惑於小人之邪說故大儒之效不見於時而宋之
治終不能等三代者此故也今日祖宗養士百年吾等
至此豈不自愛其身哉自踵至頂皆朝廷之所有也但
於聖賢之道有虧恐非養士者之初心矣吾榜中號為
得人然卓卓者無幾其中豈無人哉但恐溺於流俗而
不肯自拔也近聞有求免作縣者其穢德已四聞矣龔
黃卓魯非人哉顧無志也無志則師保閭下亦祇以如
吾之前言而已況給事御史哉昔伯玉行年五十知非

吾謂明日死今日知非亦可僕非多矣君無忘助我也
君勉之入德自近思錄始陳獻章先生今第一流人也
可近之令弟員外先生叱謝師覽無錢君可助之更病
事千萬維持使無後顧之憂蓋元患吐紅服多寒藥隨
成自遺虛怯而今則時頭痛手足痿痺曾出回手已不
能馬鞭蓋勞便受風也而今已成狼狽回家調治一二
年便來煩公卒調護之

與何惟一

足下欲為好人乎當以國家為心生靈為念聖賢為師
孔孟程朱之道力行之而已欲為好官乎則如此而已
足下豈徒欲為好官者哉

與鄭御史

為御史大本當以明道為法而隨時措之床頭易曾振
塵否

與夏止菴憲副書

凡寬則百敝皆生嚴則可理雖處一家或教鄉校十數

人亦須嚴況司一道長萬夫乎吾嘗以此告相知者皆
未有信而行之何也凡上有好者下必有甚焉今貪官
甚於盜劫皆欲止盜盜愈止而愈有先生買田金牛而
好義之家如張邦俊願施百石羅俊極毛英懋皆欲出
三十石此豈有所強哉下觀而化也止菴記及寧縣文
猶未暇成姑俟入山方可了也

一峯文集卷九

欽定四庫全書

一峯文集卷十

明 羅倫 撰

五言古詩

湖西八景次陳石齋韻

太極九春

鄉名太極何山象太極也天城環周三百里象外兩
儀也中峯忽出平地峯麓迴抱廣袤百畝象中太極
也書院居之

一九三百里兩儀位太極誰從羲皇前畫此無量易白
日煥天章萬古永不蝕吾亦欲無言玄天本幽默

翠玄幽玩

光霽巖東去太極書院十里許東儀之麓也別號翠
玄洞天洞高明圓廣下容千夫深不可測遊者秉燭
丹房繡壁奇形異狀耳目未有東南巖壑最勝未有
先於此者

金鰲開一竇乃透玄雲麓一入洞天遊火龍銜玉燭仙

都象衛嚴永夜不得宿仰視但鴻蒙瀛海駕蟠木

金鰲霽雪

太極東山高踞雲漢若巨鰲橫海隆冬初寒未雪先
白已霽旬月浩然猶故

東極蟠金鰲寒通雪山白祝融鞭火龍六月銷不得曾
上金鰲頭已在崑崙側只恐金鰲飛白玉橫天勒

玉晃晴雲

太極南山羅絡奇詭此峯尊嚴若端冕垂旒暑夏亢

陽雲巾其頂霖雨時應土人仰之以為雨候

坤厚載神秀雨暘時若之沛然澤下土乃與天公疑朝
隤已膚寸燠旱方此時虹霓慎勿見羣黎生苦饑

大旒垂玉

太極北山水心之主山也山腹靈湫濛泉注湧飛流
千仞如垂玉然

大旒自何許太乙元精傾此水下無敵上與銀河并一
入衆生口萬劫塵心清萬劫塵心清萬劫消心兵

飛舉橫翠

太極西山高望金鼇翠屏萬仞一碧橫空世傳飛仙
駐舉其上

仙人此息駕太極開鴻冥如何紫蓋力敢與崑崙爭蔽
虧三萬里晝夜移天行紫氣滿雲漢可望不可名

一峯來秀

一峯在太極為中峯在書院為西峯在水心為南峯
水心太極北山之麓吾廬居之向一峯歸然其南故

曰來秀

太虛忽突兀孤碧自天拄完完太極鄉浩浩陽春塢萬
象羅兩儀俯首環內貯撫掌無極翁昨夜聞天語

三峽迴清

三峽太極水口山也第一龍堂峽第二龍湫峽第三
下瀧峽盤回百里溪流其中

百里蟠天城天河下縈互羣龍沕淵潛衆蛟輕使負源
通崑崙丘影接扶桑樹日暮聞棹歌武夷是何處

遊太極九春次容彥昭二首

天心開太極天脚垂碧草草根雲峯青萬壁拱蓬島
中一九春自此風光好撫掌無極翁蒼天未曾老

又

太極開蒼冥天心非草草四山突中峯翠環擁瓊島一
九三百里萬象各妍好中有長春人獨抱春風老

遊翠玄幽玩二首

紫薇開洞天拚此玄黃擘天人好珍奇玉府寶藏塞君

居南山南我居北山北爾汝兩忘形相看非物色

又

玉堂囊青山母乃巨靈擘羣仙燕清都一壺春拍塞紫
氣來青牛窈然忘南北指點極虛無太玄本無色

贈易德元陳秉常次陳石齋

朝辭白沙雪夜卧西湖月湖天月在水炯然清爽接吾
家富薰天大造委此業掉歌揚中流速爾進歸櫟

聞趙允用北行偶寄

病夫懶讀書只愛華胥境一榻松風清北窓清晝永合
眼見周公山童驚不醒君今旅途遊莫戀邯鄲枕

卧龍巖次容彥昭

夙昔慕至寶尋此蜿蜒蟠逶迤到龍門落手驪珠寒掌
中見明月眼底無琅玕飛潛各有會與爾隆中看

送何喬壽歸盱江

何生盱江來魯秀媚寥宇孔門二三子參也吾與汝一
片金牛雲萬傾西湖水去去勿復道玄天默無語

馬龍瑞芝堂詠

馬家真龍種西極來流沙毓此玄氣精千載成靈華應
圖光瑞日鴻祉熙無涯浩歌靈芝辭為我懷漢家

寄梁德剛

南海李德孚已從白沙老西江梁德剛狂愛青山好德
剛發長笑青山莫吾惱猿鶴爾勿驚吾亦歸來早

四皓圖為饒雯峯題

天地有此山直到此翁好皓髮驚龍顏險語正穹昊後

車來飛熊何如渭濱老俛仰幾羸劉朝夕屢榮槁白雲
照空山霞外跡如掃至今山上芝翳翳荒秋草

和陳白沙二首

水雲媚一窩去天九萬五饑腸冰玉清飽嚼雲月苦掉
頭懶應客多謝巢與許客去掩柴扉隨引鷄豚數仰面
看行雲藹藹翳層宇庭柯鳥聲和喚醒夢中語

又

君年四十八我年四十五百年幾會面念此長恨苦金

金史卷之八
臺首相見各委霞外許擁懷素心人動輒屈指數貢然
三子來歡聲撼茅宇瀧濱是曹溪他雨對牀語

松雲為易德元父世衡題

崢嶸白雲東松樹幾千尺曾經秦漢來萬古橫一碧黑
風捲青山白晝飛霹靂須臾洗層霄見此太古色茅簷
清露繁研硃點周易

讀太白詩

太白橫西天萬古色不改至人孕元化風豪驚百代青

天騎白龍傲蕩弄雲海太白邀我來招手六合外太白
與我言為我開天在拾得白日還迷途杳無礙

題陳僉憲粹之和四皓圖二首

秦坑氣熱天商山色方好一鹿走寰中孤鳳鳴秋昊多
謝赤松徒設網羅此老片語回天心一氣噓萬槁遂令
箕箒妾敢把漢宮掃噫嘻隆準公作事何潦草

又

箕箒去已遙山林復誰好亦有采芝翁皓髮照蒼昊嗣

金
卷十
漢配彼天赤手藉此老東隣亥字人獨伴霜木槁野雉
懷鳩心火龍宜電掃何乃迷先幾人疑橫秋草

思親堂為建昌王垣賦

青青澗畔松不為霜雪衰鑿鑿澗中石不為流水移胡
為白髮人忽若朝露晞長夜去冥冥兒心寧不悲泣血
不到地滴著身上衣衣當有時樊兒悲無已時兒身匪
金石不死將何為生當長相思死當長相隨

思親堂為建昌閻明賦

仰觀天蒼蒼俯視地茫茫天地亦何極人命如朝霜靈
椿忽已摧萱草凌北堂慈烏反哺心悲思結中腸夜夜
吐哀音涕淚沾我裳圓景淡無色浮雲慘不揚羨牆終
乃身參閻同翱翔孤芳振千載黃泉耿幽光

題界江李文光八景繼陳公甫作

石齋天下士落筆浩縱橫江山欲改色星斗芒寒明界
江忽在手萬里隨君行龍眠久黃土此畫天無精想當
盤礴時半夜雷霆驚依依古槐柳不謝東風榮紫烟生

卷十
瞑色霽月涵秋清宛宛牧童起翳翳漁燈青摩訶亂吾
伊夜靜如聞聲舍弟廣東來念子江湖英唾壺歌欲缺
玉筍爍蒼冥

贈容彥昭次陳石齋

傳呼走柴門有客邁行只衣冠不駭俗語言多近裏可
是白沙來乃渾化查滓白沙霞外客兄弟適與處伯兄
遣君來此意良何以肯為廟堂尊而迺山林取何由見
汝兄汝弟見可矣詩好兒童傳誼高朋舊喜我非青囊

徒聊爾嬉雲水憑君具隻眼一照三萬里

用揚龜山此日不再得韻送馬生歸南海

玄黃浩無極滄溟忽枯桑況乃么麼生浮雲度虛蒼聚
散倏忽間惜此分陰光方寸渺六合太極九陰陽氣機
乘出入寂感無邊方存亡繫摻舍泰山遠毫芒冰淵視
臨履安此終然臧利劍一入腹慾火肺肝戕雲子委塵
泥至寶珍批糠襟裾衣牛馬四大空昂藏已羞含遺臭
焉能復流芳咨爾媚學子有欲斯無剛及時醒大夢晝

夜馳徬徨仁宅固云廣義路亦已長居由聖所與曠舍
成荒莊馬生南海來玉質披天章脫跡露軒冕游心聲
教場謙受若虛谷忘悔同牽羊顓師學干祿顏回誠坐
忘毫釐謬千里先幾宜自強寒雪立未消朔風上歸航
脊梁爾鐵硬一擔挑綱常仰視白日舊萬古何當忘負
茲彼綿力盡然我心傷行邁勵無數罔念聖作狂

壽劉菊莊

天台老僊伯云是菊莊翁朱顏映華髮碧眼開方瞳淡

蕩弄雲海飄飄隨西風東籬下白菊暗滿黃花叢夕歸
餐落英為我好顏容世事懶開口薄俗爭樊籠黃金生
羽翼飛入蓬萊宮蒼生亦何罪遭此捉魚兇天命且不
畏況乃悲人窮肝肺苦焦裂耳目昭昏聩悠然遂獨往
長嘯巖扉中金丹煉玉質曾與安期逢金牛卜仁里杖
屨頻春風諸昆總愛客情深非貌恭盤飧稱豐儉芋栗
呼兒童淹留未忍去引劍摩蒼穹清芬散蘭雪高綵凌
烟虹鯨鯢不敢動蚊蠆若為鋒把此共君往前山雲數

重得酒輒復醉但恨糟林空不學張子房長饑從赤松
冥冥撫六合造化無全功男兒生世間猥瑣非英雄

四言古詩

存德堂為西溪何純賦并引

見山先生忠于宋吾祖武岡府君之同道也太虛先生
隱于元吾祖松野先生滄洲先生之同道也羅與
何世同道者余故賦之

於維見山赫赫武功不顯其忠武岡攸同

允文太虛滄洲維則炳文之德昭我南國

見山之族太虛之孫纘戎列祖積德彌敷式我後昆
詩不有言德輶如毛民鮮克舉之維何氏世舉之誰其
風之作頌嬋之維彞正甫與之

右見山四章一章二章章四句三章章五句四
章章七句

一峯文集卷十

欽定四庫全書

一峯文集卷十一

明羅倫撰

五言絕句

題饒雯峯山水四首

混沌太古色江山烟霧中
草堂無俗客日日來春風

二

年拋造化外氣入烟霞間
夕陽林下路白髮照青山

三

素琴本無絃白雲本無心
虛舟在野外知他浮與沉

四

層陰閉六合萬徑無行蹤
老翁不僵手一絲繫春風

題饒松坡畫四首

青山不解語流水豈知音
仰面發長嘯蒼蒼對此心

二

雲移山不動客去水相隨
高卧南窓意羲皇祇自知

三

一棹歸何處
柴桑是我家
莫言嫌一飽
籬下有黃花

四

笠下眼似海
驢背肩如山
雪月品題徧
翻笑天工慳

山水小景

老屋青山下
孤舟淺水邊
黃昏魚飯飽
搥却矮篷眠

月梅

廣寒夜突兀
疎影自天橫
嫦娥不敢睡
合眼夢魂驚

題陳粹之龍

北斗司元柄南湫亦化工若無天在手泉下不相容

題毛英懋春夏秋冬小畫

曙氣薰雲壑香風戀草堂小舟輕一葉恰好受風光

夏

高閣不受暑脩然午夢涼棹歌何處起清吹落滄浪

秋

秋水清無底幽然淨我心片鴻天宇順落日放船吟

冬

滕六寒無恙山河信手封老翁無住著隨意繫江風

和緝熙薊城謾興

低頭看明月仰面貪歸鳥庭前白露下已濕青鞋了

寄梁德剛歸自南雍

笑殺南園老秦淮醉幾秋歸來無一語酣劍看吾鉤

題蘭與饒裕

翠袖舞春暉光風聖得知夜深渾不寐玉露點羅衣

又

春動雲丘筆幽蘭映雪窓一峯纔拂手六合散天香

題竹與蕭球

玉英臺下路半夜舞青鸞龍孫眠不得疎影上闌干

題族叔潤屋先生鵲圖

昨夜下天河南飛路幾多歸來無一語無奈月明何

晚翠樓

長簿消晨烟返照啼幽鳥飄然過片雲寒山青了了

蘭

春意自天來
靈均氣未回
山童呼不醒
飛上楚王臺

又

紫心蒼玉珮
初散玉皇家
昨夜瑤臺月
憐君未欲斜

虎

白日君當道
山前子婦悲
秋原烟草裏
誰復問狐狸

綠扇

碧雲從天來
清風落君手
老龍睡初醒
恍惚無何有

題饒雯峯鴈

時序炎涼異南來又北歸乾坤三百里惟爾識天機

陳舜明泰齋

秋候天如水風清月正明浮雲斷一點長望泰階平

題松與漂水袁濟

人心是浮雲一日幾變易吾友山下松此心已如石

夢

日晏歌黃鵠時清茹紫芝君心天下獨天意獨君知

初四日夢

東井回天地西奎應古今已無生與死况復說浮沉

二十九日夢立誠

北斗佳人在東風信此君省他天意思深得月精神

二十二日玉筍夢

關山一隻鴈霄漢雨三峯借問門前水依然萬折東

丙午十月初三日夢

鐵騎鎖東風殘花野興濃玉梅猶在此消息自天通

五言律詩

和林緝熙正密堂

寂歷驚猿定幽軒月到時江山空翠在肝肺老天窺甲子消明鏡泥塗渾素絲可堪藤簟冷香露滿薔薇

易菴李令譽同學郡庠別二十載見子金牛驚

喜交集敬酬元倡

昨夜茅堂裏匡牀共語時君心江月得吾意岫雲知歡極盃無算交深道愈夷宦情渾欲割畎畝真吾師

和緝熙示弟之作示諸生

寒餓添疎懶輕肥誤俊英人心爭水火造物刺孩嬰自
在閒中睡倉皇紙上名分明眼前事聊復醉還醒

劉氏孟禎迎暉樓

天道此中和江樓曙氣多浮雲消海岱病眼對山河年
老流光易春酣放口歌茅簷寒餓久愛爾數相過

讀書樓為門生張麟賦

溪山深隱處一逕漸通幽六合同吾宇南州獨此樓浮
雲連海動河漢自天流高枕丹霞上春風笑未休

挽揭竹菴

竹菴忘此老伏臘走比隣碧草他生夢黃花化後身石
田孤鶴瘦烟水五湖貧却憶經行處西風淚滿巾

南村別墅為饒松坡題

吾愛南村好頻過處士家白雲留客住濁酒隔牆賒陰
壑藏春雪清溪洗暮霞自今來往慣薇蕨早生芽

答陳公甫

青天回白首霞外送冥鴻沙界無窮樹霜空見此松君

王留一劍老病息孤蓬試問雲臺趣農談信野翁

公甫感秋有吟因寄章德懋莊孔易及倫三人

用次其韻

大地秋風動萬竅無定音山河孤鶴夢風雨一龍吟青
眼有此客白雲何處心思君令人老華髮一千尋

佛嶺三首

元兵李恒追及文山神石隆隘道阻先君武岡公被
執輦信戰于東固死之即此地也

宋運方當絕人心未死何降王納款日義士揮天戈鞏
信支東固文山節五坡君看草木氣猶自壯山河

二

秦賈先亡國文山可奈何自憐天下詔誰奮魯陽戈生
死勤三后忠誠動五坡高風不可見名落舊山河

三

追塵特地起孤憤奈天何翠玉樓前淚黃雲塞下戈二
龍爭北野孤鶴夢東坡却憶樊籠外乘槎欲泛河

磬頭次陳秉常

萬里崑崙小蒼茫快此登層雲開赤脚陰壑動玄靈練
石嫌天漏尋花愛國馨青山來戀我應識草堂情

雨暉樓次容彥昭樓舊名迎暉夢改雨暉

畫棟飛雲表鴻名落夢間大明開晝夜光霽動天山高
枕元龍卧橫江一鶴還老夫幽興熟為爾一開顏

光霽巖次容彥昭

太極開天府清虛此一堂幾迴桑海變不及廣寒香萬

象懸金谷羣仙醉玉牀蓬壺深咫尺生被碧山囊

府教巖次容彥昭

先君武岡公名開禮字正甫宋進士授武岡軍教授
德祐元兵南渡辟知永豐縣從文山起義勤王空坑
之敗大罵不屈囚吉州獄八日不食而死文山北行
制服哭祭之事在宋史巖在婁原洞幽巖東迴紆明
瑩公嘗幽棲于此土人以其官名之

金身不可斷鐵心應易酸風吹浮雲去吾與南山安頽

額蒼天在瀟瀟白日寒橫流當砥柱迴却黃河乾

扇和巖次容彥昭

如何深厚底藏得一壺春朔雪不到地春風長被人天
陶吾輩老花好自家新聞道山靈語知予樂是真

又

陽和在深谷無秋旦旦春山颺憎過客巖燕喜來人風
軟瓊芝脆天清玉宇新桃花逐流水去住任天真

水心書院次容彥昭

遊子來何之來之水心亭同流混清濁高思入玄青病
菊東籬醉幽蘭陋室磬石齋頻入夢經緯兩冥冥

書崇仁萬玉山僧房廖欽止處登瀛洲達此寺

三十里

王道荒東漢山名自太康璣衡斟北斗雷雨動西方客
夢雲隨鶴禪心月在牀登瀛三十里前路滿風光

和林緝熙遊玉笥山并序

玉笥山大秀宮道家號法樂洞天奇秀旁流南海布

衣林緝熙雲水名岳從羅浮春于山中道士許清源
顧留乃開青囊約徙宮于天王閣結羅浮菴于閣後
最奇處時從行者黃時憲王忠肅許良揖陳符用符
用候秋落手此菴云

野仙臨玉筍引袖拂天星侍立雙童小看山隻眼明洞
雲含雨潤鶴夢帶烟醒自嘆羅浮客春杯溢四溟

送饒經歷還金谿

問病來金嶂高談徹玉關何人無白髮吾道有青山雲

水流行處漁樵問答間孤舟今夜別明月共君還

瀧濱次容彥昭二首

南海三君子來問瀧岡居山高日月小樹古虬龍紆暮
年得一飽衰力尚三餘寄言白沙老倦翼且棲梧

又

別業來何處瀧岡水竹居江山容我老朱紫信誰紆南
海三君過西窓兩月餘劇談中夜起香露滴高梧

毛氏西園次容彥昭

毛氏西園好溪南未有之參橫虎出夜松暝鶴歸遲病
骨青藜杖秋香短竹籬小窓孤榻在合眼見巢夷

送梅鼎歸鉛山

歸路鉛山縣梅花萬樹春青天元屬我白髮肯饒人道
德看前輩冰淵戰此身寄書長不達傳與故鄉親

定賴丕初宿金牛夢意

氣運回千載何人朕兆先天花搖鳳舞雲錦擺龍眠垂
統開來學沿源得不傳東風又周道四海正懸懸

送王生歸家

王家兄弟好吾道在南安禮樂開三極陰陽渾一九春
深冰自水人去雪猶寒天末涼風起浮雲正好看

清風洞次容彥昭

問爾來何際來從象帝先后靈噫紫府和氣蕩光天骨
冷龍眠處魂清鶴夢邊古今渾不息君子自乾乾

翠華巖次容彥昭

皇天開洞府自我馬蹄忙春漏黃金界雲和翠玉房寶

山陰火動玄竇紫霞香回首無何上神功接混沌

和林緝熙過劉宅韻

舉舉扶胥子雲樓日幾層野人回碧眼赤子問青燈山
盡天無礙春歸夢有憑冥鴻看杳杳遮莫頗虞曾

送劉師覽分教沅陵

塞外傳金口沙頭醉玉卮青山宜我病明月憶君思江
漢清秋潤沅湘白日飛廟堂登稷契雲壑隱巢夷

江山一覽亭

一目空南極飛梯上紫烟幾鬟孤照外匹練落霞邊江
漢心宗海嶺華氣擁天魯城春服後此地亦悠然

一橫亭

有客在南溟文章氣已冥何人看北斗稚子指東星下
釣綸方定燒茶夢未醒湘雲今我是曾上妙高亭

文鄉書舍

吾道貞元日文鄉氣又春乾坤三萬里江漢一完人山
氣通雲谷泉聲是泗濱大虛皆我屋明月可芳隣

蒼雪亭

蒼顏未覺老古心誰與同風雪不改色山林惟此翁吾
憐造化意乃在山谷中盤桓成浩嘆萬壑生清風

九月夢

南師翻孔孟西客鏤唐虞秋月梧桐夢春風故舊書陽
回天有信雲動海成虛試問圭峯老乾坤幾乘除

天上人間

吾廬依北斗人道是東山雲卧星槎穩天中帝柱閒路

由黃道表人在紫薇間誰捧三竿日凌烟夢未還

小蓬萊

引袖拂蓬萊飛雲九曲臺火當三殿去山送七星來洞
府春如海秋空夜不埃白衣如邂逅沈醉菊花杯

九曲飛雲

羅浮在天上指點是玄微九曲雲中去三天日下飛紫
薇迴閣道清露濕仙衣世路羊腸險人間悶不知

言志

歸路玉花驄行人大華東龍頭驚昨夢馬足信東風天上開三省江南問一峯養雛成大鶴種子得高松

十九日夢

秋風為誰急秋草為誰深吾道通天地人心自古今誤疑梅是雪不道菊成金昨日東籬下山樽滿滿斟

夢吟浮香塢

塢舊名大山可里許陋巷居之丙子鄉薦後庚辰辛巳間晚道其中覺一所有香叔父修益曰山中必有

香草也先府君然之既而香漸廣丙戌登大廷南遷
得歸異香滿塢晚則薰室繼生諸子比已寂然乙未
春陳公甫門人容彥昭易德元陳秉常夕于塢中因
及其事欲定名而未得其夕夢曰浮香塢

異香浮上界春到紫薇家人道誰從定天心未有涯野
風依客興丹露對流霞可是長春境蓬萊萬歲花

夢吟異奏亭

予家龍池之上浮香在池東異奏亭在池西亭名異

奏何也乙酉赴南宮予出三門外張宣輝後至奔告
曰適間龍池西北鼓聲鏜然木板響答以族右其樂
別也竟不見人此何祥乎先兄陽和先生曰此山英
靈送吾弟往矣何以人為予目止之行至西崗聞金
銅聲以巡司官在岡外也既而亦無浮香塢既定三
君曰盍圖此以對其夕夢曰異奏亭

君行孚天地君心動鬼神大名中日月吳樂播韶鈞阿
閣猶儀鳳西郊未出麟如何湖上曲長奏洞庭春

夢定春堂吟

壬辰標生先夢人報其母曰五魂無主中和動氣動
中和萬古春繼曰一定萬古春乙未夢曰似君不老
可無憐夫嬾同春一萬年無限雲霞皆落手定春堂
上繡香煙既定其塢曰浮香亭曰異秦堂曰定春館
曰同春云皆乙未夏夢也

東風無著手却向草堂來大化留鈞座光天落壽杯有
雲皆載雨無地不栽梅餘慶吾家厚元君未鑿坏

夢同春館吟

日日是春風吾家大化同一誠乎犬馬五教及兒童水
暖魚魚出泥融燕燕通度江春色滿花柳各青紅

十二日夢文岡阡吟

文岡之阡曾大父元六府君大父善耕府君季大父
永四府君阡也天順癸未春試燕臺夢歸謁阡石門
三重甕卷如城左右閭人高齊于門倫慨然歐陽之
阡既名瀧岡此合名龍岡乎傍白衣人曰龍岡不若

文岡倫曰何謂文也白衣指一山曰此非文峯乎但見一峯蒼翠出門高秀刺天舊名椒園因易其名曰文岡

虛無曾指點三老已蓬萊春意回函丈天光落上台大明萬怪伏丈秀一峯來無限風光好南山進壽杯

入道門

爾等由吾道須先自洗心雪消春動草月上夜鳴琴杏脚書壇古雲根石室深幾人能到此白髮忽千尋

五言排律

古潭為劉禮作賦

秋江有古潭開自無極先飛流掛北斗靈源通上天陽
潛含渾渾陰閉入玄玄深淺滄桑外浮沈宇宙邊洞明
空地底虛大貯天圓日月含黃道星辰泳紫躔脈通青
嶂骨文爛玉霄箋河漢清無敵滄溟勢欲連鏡平飛組練
珠抱睡蛻蜒馬飲河圖出龜呈洛數全嫁蟾橋度鵲入
鳥鏡窺鸞河伯羞夸大秦鞭浪欲填壽籌逢海屋仙樂

洞庭絃雪艇寒無恙星槎夜欲編一虛空礙滯萬象訝
森駢孕秀生豪傑高門得世賢忽逢江上老疑是水中
仙湛一心源寂瀾翻舌本懸詩懷傾浩蕩道體見淵泉
濁激塵滓散冥窺混沌穿暮春陪點浴清夜共烹沿淡
薄交情古光明夜氣鮮靈均曾種芷茂叔為栽蓮白髮
欺明月愁心散紫烟羊裘霞外釣漁笛月中舡嚴瀨名
高斗愚溪唾積淵隨波豈吾事浮海竟誰緣機外鷗三
點間中鷺一拳搥蓬來鶴夢歌掉動龍眠世態隨陽鴈

塵根脫殼蟬濯纓呼孺子鼓柁鬪嬋娟海若低偷眼馮
夷醉拍肩談玄驚鬼膽話妙破天權夙好羅浮客呼來
不上船菜園寬似海醉筆大於椽運泰肥三極歌傳滿
大千傍花眉展秀見酒口流涎樂水心元癖尋山意亦
便正冠來入社潤筆不須錢治世三生佛閑官一味禪
著書深閉戶共爾磨甕堅

雯峯山水吟并引


盱山水奇也雯峯山水又盱之奇也太守饒公秉鑑

卜別墅于此焉倫過而悅之裴徊不去者三日公癖
于山水倫之癖有甚於公者於戲自風水之說興人
怠於為善矣山川亘宇宙人事之迭往迭來者何足
恃也雖然尼丘孕孔嵩岳降申扶輿清淑之氣其鍾
在人固矣惟善則得之饒氏之子孫其勉之吾見其
大矣

造化鍾神秀靈峯好山水人道崑崙來起止三萬里其
根盤廣莫枝葉布寰宇恒碣維北門皇都天帝主在德

不在險古道吾有取是邦固雄壯奇秀實在此天功巧
雕琢無乃役神鬼萬馬雪中奔羣鶴自天翥蜿蜒翔蛟
龍蹲踞降虎兕玉堂端筆鋒寶殿開斧袞武侯八陣圖
李靖六華壘疏鑿神禹功積聚伏波米衆奇雜前陳眼
手驚顧指太守好事者伊此開別墅野師方云云道眼
自許許病夫一經過極口歎不已奇寶委道傍盲者宜
弗視良驥非伯樂鹽車竟垂耳太守聞予言一夜喜不
寐予為太守說風水何足恃聊此娛吾生百年能有幾

貧賤我輩安富貴子孫喜富貴足良圖在此不在彼我
昔登東山周爰觀闕里荒哉曲昇城離離滿禾黍魏魏
魯東家天地與終始後來希聖徒亦有朱夫子四海幾
滄桑兩家大華峙先民重積德德積福乃趾云何晉唐
後邪說熱天起青囊不自課金函與誰啟有術勿自福
況福它人只何當焚其書一洗青山恥由來積德門光
嶽鍾英偉君家尚勉旃螽斯蟄麟趾朱有遺訓曾揚
休掛齒



一峯文集卷十一